

pupuri i nga mea papai o taua Ao hei oha ma tatau kia ia. a. ka tuku iho ki a tatau tamariki. E tika ana me whakahou te kaupapa o ta tatau noho i te Ao nei. No reira e karanga ana nga reo marauna o naianei, me whakaropu te Ao Hou. Tena, he aha te kaupapa mo taua Ropu o te Ao Hou?

Ko tooku whakaaro tenei mo taua Ropu.

1. He whakahuhihui i nga kaha mahi, i nga kaha matauranga, i nga kaha mahara o te Iwi e marara noa atu ra.
2. He tirotiro, ka whakahuhihui i nga whakahaere e korara noa atu ra, e korara noa atu ra.
3. He whakakotahi i nga tirotiro mo nga take e pa ana ki te Iwi i raro i enei wawabanga.
 - (a) Take o te ora;
 - (b) Take whakatiputipu i te Iwi;
 - (c) Take e pa ana ki nga kura;
 - (d) Take e pa ana ki nga matauranga nunu;
 - (e) Take whakaako i te Iwi;

Otira taua Ropu hei kai-hautu mo te Iwi i tenei wa.

KEI TE NGOIKORE TATAU.

He wa tenei no te Rererangi, no te korero takiwa, no nga kai-puke ruku moana, no te hiko, no te hokohoko, no te ahu whenua. Kei te pokaikaha noaiho tatau ki roto i te maru o enei mea. Kaore ano a tatau nei hoatutanga ki nga taonga nunui o te wa. Te tunanako atu ma te Ropu nei te Iwi e whakakorikori, kia ara ki runga. Nga kaha pakupaku kei a tatau, ma te Ropu nei e paihere kia neke haere ai ki te nui. He paku whenua kei a tatau e toe ana. Ma te Ropu nei nga ngoikore e tohutohu me pewhea te mahi e piki ai. Mo te taha ki a tatau kura Maori. He maha rawa nga haora o te ra e whakapaua ana ki te mahi i nga mahi o waho. Ka pau noaiho te taima mo te ako ma te Ropu nei e whakaputa te whakahi topu a te Iwi ka whakarangona mai e te Tari Whakahaere o nga kura. Mo te taha ki nga kura pera i Te Aute, i Tipene, i Waerenga-a-hika, i Paerata, i Otaki, i Clarendon. Inaianei kaore i te uruatu te reo, me nga mahara o te Iwi ki nga whakahaere o enei kura. Ma te Ropu nei e tirotiro te ahua o enei kura. He maha rawa ranei enei kura mo te momo whakaako kotahi. E tika ana ranei me wehewehe a ratau kaupapa matauranga e whakaako ai. Me whakaiti iho ranei te maha o nga kura, ka hoatu i nga moni hei oranga mo nga mea e whiriwhiritia kia waiho. I te kore ropu o te Iwi, kaore tatau i te pa atu ki aua kura. Ano te ahua o aua kura he kura "pauweti" na tetahi ropu pakaha hei mahi moni ma ratau. Ahakoa pai te whakahaere o aua kura e tika tonu ana kia pa atu te Iwi nana nga taonga. Tetahi mahi tika ma te Ropu nei he tuku i tetahi tangata i etahi tangata ranei, ki te kauwhau haere ki te Iwi i aua kaupapa, hei whakaohoho i te Iwi. Mo te taha ki te ora o te Iwi, ki tooku whakaaro me tuku nga kaunihara marae hei whakahaere i tera taha.

Kaati ake enei whakamaraua mo te aranga o te tahu o te whare e kia nei ko te Ropu mo te Ao Hou. Tena ma wai te karanga tuatahi.